



Kabarett „Sachsenmeyer & Co.“
09224 Chemnitz
Feenweg 11

Hauptspielstätte:
Kabarett-Kiste (im Hedwigshof)
An der Markthalle 8
09111 Chemnitz

Bestell-Telefon: 0371 - 694 77 11
www.sachsenmeyer-kabarett.de
e-Mail: sachsenmeyer@t-online.de

41. Kalenderwoche – ab 10. Oktober 2010

Voreinischung is schwähr!

Nu hammorsch erschdema ieborschdandn - de ganzn Gedenkdaache zur deudschn Einheit un so!
Mor konnde ja schon kaum noch de Zeidung offschlachn odor dähn Färnsähor anmachn... das Gligg
dor Voreinischung had nur so gedriefd! Un de Obfor sin fasd widdor offerschdandn!

Wobei - dor wischdischsde Gedenkdaach, dor siehmde Ogdohbor, wo de DDR gegrinded wordn is,
da is de Berischderschdaddung doch e bißl mähr zurigghaldend gewähsn. Obwohl das ja
eischendlich dodahl falsch is. Mid dähm siehmdn Ogdohbor had ja alles erschdema angefang!
Ohne de Grindung dor DDR häddes ja ooch nie eene Wiedorvoreinischung gähm kenn! Erschd
kommd de Drennung, dann de Wiedorvoreinischung! Das is so.

Wobei - wemmor immor von dor Wiedorvoreinischung redn dud, da dun ja eischendlich zweeje
dazugeheern. Wenn bloß eenor da is, dähr dähn annorn eingassiern dud, dann isses ja keene
Voreinischung, dann isses ja ehor eene Eingemeindung odor sowas wie eene Zwangsheirad!

Na, un wemmor ma genau hinguggn dun - de Wessis ham sisch eischendlich nisch voreinischn
wolln! Das haddn die sich iebor de Jahre schon längsd abgeschmingd! Friedlische Goegsidenz -
odor wie das geheeißn had! De Vordräsche von Helsingi un so. Die warn mähr mid sisch selbor
beschäfdischd. Schaffe, schaffe Heisle baue un nisch in dähn Osdn schaue!

Nee, eischendlich ham sisch de Ossid dähn Wessis offgedrängeld.

Na, währ wollde denn auswandorn in raue Meng? Das warn de Ossid! Nee, isch wissde nisch, dass

greesore Meng an Wessis sich gedrängd ham, in dähn Osdn zu komm? Odor sogahr unnor Einsatz von Gesundheit un Lähm in dähn Osdn geflohn sin? Nee, das hads werglisch nisch gegähm. De Wessis ham ganz friedlich driehm ihr Ding gemachd un warn froh, dass nischd mid dähm Osdn zu dun ham missn. Un bledzlich ham de Ossis vorriggd geschbiel!

Die baar Flischdlinge, die immor ma nach driehm gekomm sinn, die warn ja zu vorschmärzn, abor nu bledzlich kam dor Ossis mid geballdor Grafd - hier sinn mir! Mir sinn ee Volk!

Was sollde denne da jedzde dor Wessi machn? Die warn dodahl ieborraschd! Nascha, un dann hammse ehm vorsuchd, das besde fiehr sich rauszuholn. Das is ja normal. Bleede sin die ja nisch gewähnsn. Wenn de Ossis sich ehm unbedingt unnorwärfn wolldn... anbietorn... - bidde scheen! - off e baar neie Absadzmärgde hammse grade gewarded!

Sischor, wenn die jedzde nach zwanzisch Jahre Erfahrung nochma vor dähr Siduadsiohn schdehn dädn... - da dädn die abor schnell de Schoddn dischd machn. Jedes kleene Loch, was de Ossis ausm Bedong von dor Mauor rausbreschn dun, dädn die schnell widdor zumauorn. De Bodschaftn im Osdblogg dädn se alle schließn. Un Begrießungsgeld kennd mor ooch gladd vorgessn.

Nee, de Wessis hamm sich nisch voreinischd, die ham sich ieborrumbeln lassn! Die Dummgöbbe!

Eduard Sachsenmeyer